

26 JULAI 2004  
BERITA HARIAN

# UPM perjelas isu guna bahasa Inggeris

53

Oleh Badrila Jamlus

KUALA LUMPUR: Universiti Putra Malaysia (UPM) semalam menjelaskan, bahasa Inggeris hanya akan dijadikan bahasa pengantar bagi kursus Sains, Teknologi dan Matematik, selaras pelaksanaan penggunaan bahasa itu dalam pengajaran Sains dan Matematik peringkat sekolah.

Naib Canselor UPM, Prof Datuk Dr Mohd Zohadie Bardaie, berkata penggunaan bahasa

Inggeris dalam kursus itu juga dilihat sebagai kesinambungan kepada usaha kerajaan, tetapi pada masa sama bahasa Malaysia masih dijadikan bahasa pengantar utama.

"UPM tidak berniat mengubah dasar kerajaan yang menetapkan bahasa Melayu sebagai bahasa pengantar di semua universiti tempatan," katanya kepada *Berita Harian*, semalam.

Kelmarin, Timbalan Perdana Menteri, Datuk Seri Najib Razak menegaskan, kerajaan tidak pernah mengubah dasar yang menetapkan bahasa Melayu sebagai bahasa penghantar di se-

mua universiti tempatan.

Najib menegaskan demikian ketika mengulas reaksi beberapa pihak yang membantah hasrat UPM, yang sebelum ini dilaporkan akan menjadikan bahasa Inggeris sebagai bahasa pengantar bagi semua kursus kecuali Kesusasteraan Melayu, Peradaban Islam dan Pendidikan Sivik.

Dr Mohd Zohadie berkata, UPM tidak pernah lari daripada tanggungjawabnya untuk memartabatkan bahasa Melayu. Malah, universiti itu mewajibkan kira-kira 800 pelajar asing yang

mengambil ijazah lanjutan, mempelajari bahasa itu.

Selain itu, katanya, kebanyakan kursus yang ditawarkan di UPM ketika ini menjurus kepada bidang sains, teknologi dan matematik sekali gus menjadikan penguasaan bahasa Inggeris sebagai aset utama untuk mendapat pekerjaan.

Beliau berkata, kertas cadangan penggunaan bahasa Inggeris bagi kursus Sains, Teknologi dan Matematik itu akan dihantar ke Kementerian Pengajian Tinggi tidak lama lagi sebelum dimulakan tahun depan.